



VTilo filius fuit Theodonis primi Boiorū ducis, quem pater cum Theodone suā prouincia nouiter acquisita præfecerat, anno Christi 512. Cum autē Theodoricus Clodouei filius in regnum diuisione Mediomatrices & Belgas sorte acquisiuisset, atq; Dani primū ea tempestate arma sua in Francos Belgas cōuerterant, Theodoricus rex hunc Vtilonem ob magnam rei bellicæ peritiam in auxilium acciuit. Franci enim & Boij æterno foedere sibi inuicem coniuncti erant. Itaq; Vtilo armato milite aduersus Danos properat, atque terra mariq; hostem inuadit, fundit, & cædit. Interfecto quoq; eorum rege Cochelarico omnē prædam ac captiuos recuperauit. Ea uictoria parta Theodoricus rex sororem suā Vtiloni uxorem dedit, atq; ob egregiam eo bello nauatam operam, limitē Antoripensi, inter Scaldim, Mosam, Rhenum amnes & Oceanum, aduersus Danos latrocinia & pyratiam agitantē, Marchionem cōstituit. Ab hoc Vtilone Caroli Magni prosapia deducitur. Cum enim ijs in locis magna uirtute Vtilo rempublicam administrasset, atq; tandem mortuus esset, Hugobertum filium successorem reliquit. Is Asopertum, ex quo Arnolphus, et tandem ex eo Angisus pater Pipini exortus fuit. Auent. lib. 3. & 4.